

SOCIAL POWER

BASES DA CONVOCATORIA 1

PARA FINANCIAMENTO DE ACTIVIDADES DE DEFENSA, PROTECCIÓN E
PROMOCIÓN DE DEREITOS A ORGANIZACIÓNS DA SOCIEDADE CIVIL

OBXECTIVO DA CONVOCATORIA	2
DOTACIÓN ORZAMENTARIA DA CONVOCATORIA	2
REQUISITOS DE INGRESOS DAS ORGANIZACIÓNS POR FONDO	2
QUEN PODE PARTICIPAR	3
REQUISITOS PARA SOLICITAR FINANCIAMENTO	3
PRAZO PARA PRESENTARSE Á CONVOCATORIA	4
DURACIÓN DOS PROXECTOS	4
NÚMERO DE PROXECTOS QUE SE PODEN PRESENTAR	4
PRIORIDADES TEMÁTICAS DA CONVOCATORIA	5
QUE TIPO DE ACTIVIDADES SE PODEN FINANCIAR	6
QUE GASTOS SE PODEN FINANCIAR	7
COMO SOLICITAR O FINANCIAMENTO	8
COMO SE VAN AVALIAR OS PROXECTOS	10
QUEN AVALIARÁ OS PROXECTOS	12
DEFINICIÓN DO IMPORTE DE FINANCIAMENTO QUE SE OUTORGARÁ	12
COMO SE VAN SELECCIONAR OS PROXECTOS	13
COMUNICACIÓN DO RESULTADO, ACEPTACIÓN E PAGAMENTO DO FINANCIAMENTO	13
COMPROMISOS E OBRIGAS DAS PARTES	13
CALENDARIO E DATAS CLAVE DO PROCESO DE FINANCIAMENTO	15
SOBRE SOCIAL POWER	16
MÁIS INFORMACIÓN SOBRE ESTA CONVOCATORIA	16
CONTACTO	17

OBXECTIVO DA CONVOCATORIA

O propósito xeral desta convocatoria é financiar iniciativas desenvolvidas por organizacións da sociedade civil que contribúan a promover os dereitos humanos, a liberdade, a solidariedade, a igualdade, a xustiza —incluída a xustiza de xénero—, a dignidade humana e outros dereitos da [Carta de Dereitos Fundamentais da UE](#).

En concreto, financiaranse proxectos que contribúan á defensa, a protección e a promoción de dereitos en relación cunha das seguintes axendas temáticas:

- **Dereito aos coidados**
- **Dereito á mobilidade humana**
- **Dereito á xustiza climática**

Priorizaranse os proxectos que traballen dende unha lóxica interseccional con colectivos especialmente afectados polas desigualdades e a discriminación, como as mulleres, as persoas mozas, as persoas migrantes e outros colectivos, como persoas LGTBIAQ+, persoas con diversidade funcional, minorías etc.

DOTACIÓN ORZAMENTARIA DA CONVOCATORIA

Esta convocatoria está dotada cun total de **1.036.666,67 euros** distribuídos en 3 fondos por tramos de importe mínimo e máximo para financiar cada proxecto:

Fondo 1: o 40 % do total da convocatoria (414.666,67 euros) destinarase a financiar proxectos por un importe de **entre 7.000 euros e 15.000 euros**.

Fondo 2: o 50 % do total da convocatoria (518.333,33 euros) destinarase a financiar proxectos por un importe de **entre 15.001 euros e 30.000 euros**.

Fondo 3: o 10 % do total da convocatoria (103.666,67 euros) destinarase a financiar proxectos por un importe de **entre 30.001 euros e 60.000 euros**.

Os importes destinados a cada fondo poderán ser modificados segundo a cantidade e a calidade dos proxectos recibidos e os importes solicitados.

REQUISITOS DE INGRESOS DAS ORGANIZACIÓNS POR FONDO

Os requisitos de ingresos das organizacións para acceder a cada fondo son:

Requisitos para o fondo 1 para financiar proxectos de entre 7.000 e 15.000 euros.

- A organización deberá dispoñer duns **ingresos anuais inferiores a 70.000 euros** no último exercicio.

Requisitos para o fondo 2 para financiar proxectos de entre 15.001 e 30.000 euros.

- A organización deberá dispoñer duns ingresos anuais de **entre 70.001 e 150.000 euros** no último exercicio.

Requisitos para o fondo 3 para financiar proxectos de entre 30.001 e 60.000 euros.

- o A organización deberá dispoñer duns **ingresos anuais de entre 150.001 e 600.000 euros** no último exercicio.

As entidades con ingresos anuais superiores a 600.000 euros no último exercicio non poderán participar nesta convocatoria de financiamento.

QUEN PODE PARTICIPAR

Organizacións da sociedade civil rexistradas formalmente en territorio español e que realicen a súa acción no territorio español, sen ánimo de lucro, non partidistas e que respecten os dereitos fundamentais e os valores da Unión Europea, recollidos no artigo 2 do Tratado da UE e na Carta de Dereitos Fundamentais da Unión Europea.

A convocatoria pon especial énfase en **organizacións pequenas e de base**, ben do ámbito rural, ben do urbano.

REQUISITOS PARA SOLICITAR FINANCIAMENTO

As organizacións que presenten unha solicitude de financiamento deberán cumprir os seguintes requisitos no momento de presentar a solicitude:

- Estar aliñadas cos valores da Unión Europea¹.
- Estar constituídas formalmente como organizacións sen ánimo de lucro baixo as diversas modalidades existentes no marco legal español (asociación, fundación, cooperativa sen ánimo de lucro etc.).
- Promover a xustiza de xénero.
- Desenvolver as súas actividades no territorio español.
- Contar con polo menos 1 ano de existencia no momento de publicación desta convocatoria.
- Estar ao corrente das obrigas tributarias e aquelas relacionadas coa Seguridade Social.
- Ter uns ingresos anuais no último exercicio inferiores ou iguais a 600.000 euros.

As organizacións que solicitan o financiamento deberán achegar, amais do formulario de solicitude, a documentación que acredite o cumprimento destes requisitos.

En concreto, **os documentos acreditativos que se deberán anexar** son os seguintes:

- Documento que acredite a inscrición da organización no rexistro correspondente.
- Estatutos da organización (debidamente legalizados pola autoridade correspondente).

¹ Os valores da UE son aqueles que figuran no artigo 2 do Tratado da Unión Europea, que se fornece aquí transcrito en galego con fins informativos: «A Unión fundaméntase nos valores de respecto da dignidade humana, liberdade, democracia, igualdade, Estado de dereito e respecto dos dereitos humanos, incluídos os dereitos das persoas que pertencen a minorías. Estes valores son comúns aos Estados membro nunha sociedade caracterizada polo pluralismo, a non discriminación, a tolerancia, a xustiza, a solidariedade e a igualdade entre mulleres e homes».

- Certificación da persoa representante legal da organización (certificado do rexistro correspondente ou, na súa ausencia, escritura notarial).
- Conta de resultados do último exercicio da entidade na que consten os ingresos anuais do último exercicio ou a declaración de impostos (modelo 200). De non contar con ningún dos documentos anteriores, poderase presentar a declaración responsable de ingresos do último exercicio ([modelo](#)).
- Certificados expedidos pola Axencia Tributaria e a Seguridade Social e, se for o caso, pola administración tributaria autonómica correspondente de estar ao corrente das súas obrigas. De non dispor destes documentos, poderase entregar a declaración responsable de estar ao corrente de pago das obrigas tributarias e da Seguridade Social ([modelo](#)).
- Certificado de titularidade bancaria a nome da entidade.
- Última memoria de actividades da organización ou, na súa ausencia, outra documentación sobre a actividade realizada pola entidade no último ano.
- Outra documentación relevante de xestión da organización (opcional para os fondos 1 e 2; obrigatorio para o fondo 3). O documento de xestión interna que envíe pode estar relacionado coa integridade ou a transparencia, entre outras cuestións. A modo de exemplo, pódense achegar estes documentos, aínda que tamén poden ser outros: o código de conduta da entidade, o código ético, o plan de igualdade, as auditorías da entidade, o documento de contabilidade ou, como alternativa, calquera outro documento similar que avale a xestión ou os mecanismos de xestión interna da entidade.

Calquera outro tipo de documentación adicional presentado no marco desta convocatoria **non será valorado** no proceso de avaliación de propostas.

PRAZO PARA PRESENTARSE Á CONVOCATORIA

Se a túa organización está interesada en participar nesta convocatoria, debes cubrir o formulario de solicitude antes do vindeiro **31 de outubro ás 17:00 h (hora española peninsular)**.

DURACIÓN DOS PROXECTOS

Os proxectos terán unha duración **mínima de 7 meses** e unha duración **máxima de 10 meses**, comprendida entre o 1 de marzo de 2026 e o 31 de decembro de 2026.

NÚMERO DE PROXECTOS QUE SE PODEN PRESENTAR

Co fin de fomentar o acceso ao financiamento ao maior número posible de organizacións da sociedade civil, só se financiará UN proxecto por organización. **Xa que logo, as organizacións só poderán presentar UN proxecto.**

PRIORIDADES TEMÁTICAS DA CONVOCATORIA

Terán prioridade os proxectos que contribúan con, polo menos, unha das axendas temáticas que abrangue esta convocatoria:

En **dereito aos coidados**, priorizaranse os proxectos que contribúan a:

- Propor melloras sobre as leis e políticas —ou a súa aplicación— relacionadas coa atención á dependencia e o fomento da autonomía para garantir os dereitos das persoas dependentes ou con diversidade funcional.
- Promover o dereito aos coidados na sociedade, nos eidos público e político, e a súa relación coa loita contra a desigualdade de xénero e as violencias contra as mulleres no ámbito dos coidados.
- Defender, protexer e promover os dereitos humanos das mulleres traballadoras do lar e os coidados, con especial atención aos dereitos laborais, incluído o apoio a iniciativas que fomentan condicións de traballo digno para traballadoras e traballadores do lar e os coidados.
- Defender e protexer o dereito aos coidados de persoas e fogares con necesidades de coidados específicas que non se están a atender axeitadamente.
- Propor melloras nas leis e políticas existentes que regulan os dereitos das persoas coidadoras, sobre todo dos colectivos que afrontan maiores desigualdades, como as mulleres que traballan no sector dos coidados.
- Avanzar na mellora do marco normativo para facilitar as conciliacións, un maior equilibrio nos usos do tempo e unha mellor xestión dos coidados no eido laboral, e promover iniciativas que favorezan a xestión colaborativa ou comunitaria dos coidados.
- Calquera abordaxe dos puntos anteriores que incorpore a innovación social como práctica concreta para desenvolver no proxecto.

En **dereito á mobilidade humana**, priorizaranse os proxectos que contribúan a:

- Identificar e denunciar a vulneración de dereitos que sofren as persoas migrantes e refuxiadas. Propor melloras sobre as leis e políticas existentes e a súa aplicación real.
- Fortalecer o diálogo dos movementos sociais coas institucións e os políticos e políticas. Sensibilizar as persoas e outros actores importantes para que defendan os dereitos das persoas migrantes e refuxiadas.
- Promover narrativas transformadoras e loitar contra os discursos de odio, os boatos, as noticias falsas e a desinformación que van en contra dos dereitos das persoas migrantes e refuxiadas, sobre todo aqueles que se difunden a través de Internet e outros medios dixitais.

- Impulsar o traballo en rede e a conexión entre iniciativas que poñen os dereitos das persoas migrantes e refuxiadas no centro.
- Facilitar a atención gratuíta das persoas migrantes e refuxiadas en temas legais, xurídicos, psicolóxicos, sociais ou calquera outro aspecto para a protección dos seus dereitos.
- Loitar contra o racismo, a discriminación racial, a xenofobia, o antixitanismo e outras formas de intolerancia.
- Calquera abordaxe dos puntos anteriores que incorpore a innovación social como práctica concreta para desenvolver no proxecto.

En **dereito á xustiza climática**, priorizaranse os proxectos que contribúan a:

- Crear espazos ou procesos para que as persoas ou as comunidades afectadas pola transición enerxética poidan informarse e participar de maneira efectiva para defender os seus dereitos. Exemplos: comunidades afectadas pola instalación de enerxías renovables nos seus territorios ou pola reapertura ou o reacondicionamento de minas de extracción de minerais ou ben comunidades que queren implementar e operativizar unha comunidade enerxética e deben superar obstáculos (financeiros, administrativos, organizativos etc.).
- Crear espazos de diálogo multiactor (universidades, sociedade civil, sindicatos, sector privado etc.) cun rol relevante nas políticas de transición enerxética e que priorizan o liderado local, a inclusión ou a igualdade de xénero.
- Sensibilizar e mobilizar as persoas ou incidir a nivel político sobre a xustiza climática, incluído o activismo xuvenil.
- Promover a reflexión cívica ampla e diversa sobre modelos económicos alternativos, como o decrecemento ou a [economía do donut](#), baseados en narrativas ecofeministas e decoloniais, co fin de facilitar a conexión entre diferentes actores (cidadanía, actores sociais, movemento climático, axentes culturais, artísticos etc.).
- Recompilar evidencia e crear propostas políticas para protexer e promover os dereitos das persoas, os colectivos ou os territorios afectados polo cambio climático ou a transición enerxética en España. Realizar accións de incidencia, sensibilización ou mobilización social —en liña ou presenciais— coas propostas formuladas.
- Calquera abordaxe dos puntos anteriores que incorpore a innovación social como práctica concreta para desenvolver no proxecto.

QUE TIPO DE ACTIVIDADES SE PODEN FINANCIAR

Cómpre ter en conta que as actividades desenvolvidas baixo esta convocatoria deberanse levar a cabo en España.

A continuación, detállanse o tipo de actividades que se poden financiar:

- Accións e actividades de incidencia, participación cívica e defensa de dereitos para influír nas políticas públicas.
- Atención directa a colectivos e prestación de servizos gratuítos de asesoramento.
- Sensibilización sobre os dereitos e os valores da UE —respecto da dignidade humana, a liberdade, a democracia, o Estado de dereito e o respecto aos dereitos humanos, incluídos os dereitos das persoas que pertencen a minorías, e a igualdade, incluída a igualdade de xénero—.
- Investigación e análise ou supervisión de políticas para ben influír na formulación de políticas públicas a nivel estatal e da UE, ben informala.
- Accións para favorecer a aplicación e implementación de leis, normativas ou resolucións xudiciais adoptadas.
- Servizos de apoio psicosocial para o equipo e os colectivos aos que se dirixe o proxecto e accións de autocoidado e coidado colectivo.
- Accións que promovan a xustiza de xénero dende enfoques transformadores.
- Organización de plataformas e diálogos cívicos e creación de coalicións e asociacións entre organizacións da sociedade civil e outros actores clave en temas relacionados cos dereitos e valores da UE.
- Accións formativas, de sensibilización ou de intercambio e aprendizaxe mutua sobre litixio estratéxico. As accións de litixio estratéxico, as accións ante instancias xudiciais ou calquera outra acción que implique un proceso legal ou xudicial están expresamente excluídas desta convocatoria e non poderán ser financiadas.

QUE GASTOS SE PODEN FINANCIAR

Nesta convocatoria financiarase o 100 % do importe aprobado para financiar o proxecto. Xa que logo, **o orzamento do proxecto non deberá abranguer o cofinanciamento doutras entidades doadoras.**

Calquera contratación, compra, colaboración ou prestación de servizos ha de realizarse consonte a lexislación española.

Os conceptos de gasto que se poden financiar (gastos elixibles) son:

- ✓ **Gastos de persoal contratado** (nóminas, incluíndo a achega á Seguridade Social da persoa traballadora, así como da empresa, e o IRPF).
- ✓ **Gastos de alugueres** para realizar as actividades.
- ✓ **Gastos de desprazamento, aloxamento e manutención** precisos para realizar as actividades. Os gastos de desprazamento, aloxamento e manutención fóra da Unión Europea non poderán ser financiados nesta convocatoria.

- ✓ **Gastos de material fungible** como, por exemplo, gastos de fotocopias, material de oficina, material para obradoiros e mais eventos etc.
- ✓ **Gastos de compra de equipos.** En caso de precisar mercar equipos informáticos ou outro tipo de equipamento, cómpre explicar a súa necesidade para a implementación do proxecto. Inclúense os gastos de aluguer de equipos.
- ✓ **Gastos de contratación de servizos externos**, como, por exemplo, gastos de edición, maquetación ou tradución de informes, gastos de servizos de consultoría, servizos de *catering* para eventos etc. Cómpre ter en conta que, malia ser financiable a contratación de servizos externos, agárdase que sexan as organizacións solicitantes as que desenvolvan e leven a cabo o proxecto.
- ✓ **Outros gastos precisos** para realizar a actividade.

Os conceptos que non se poden financiar (gastos non elixibles) son:

- ✗ Gastos non relacionados directamente co proxecto.
- ✗ Gastos declarados e financiados noutras subvencións.
- ✗ Impostos, no caso de que a organización os deducise ou reembolsase con anterioridade (IVE).
- ✗ Xuros debidos, débedas e outros cargos relacionados coa débeda, provisións de gastos etc.
- ✗ Gastos excesivos ou superfluos. Considérase excesivo o gasto que supera en gran medida a contía precisa para acadar o obxectivo proposto. Considérase superfluo un gasto que non é preciso para acadar o obxectivo proposto.
- ✗ Outros gastos que poidan resultar non elixibles consonte a normativa da Unión Europea.

É importante ter en conta que **non se permite o dobre financiamento**. Cada gasto incluído no orzamento do proxecto ha de ser único e exclusivo desta convocatoria; non poden ser gastos que se financiasen previamente nin se pode solicitar financiamento en paralelo para eles por medio doutros programas ou fondos. Esta limitación responde ao establecido polo programa CERV da Unión Europea, que **prohibe expresamente declarar un mesmo gasto en máis dun proxecto financiado con fondos europeos**. O incumprimento desta norma podería supor a cancelación da axuda e a obriga de devolver os fondos recibidos.

COMO SOLICITAR O FINANCIAMENTO

Para realizar a solicitude de financiamento para un proxecto, debes seguir **3 pasos**:

PASO 1. Fai clic en www.socialpower.es e, a continuación:

- **Se a túa organización xa está rexistrada:** accede á zona privada coas credenciais (se esqueciches o contrasinal, podes restauralo premendo no botón de

Esqueciches o contrasinal?). Na área privada, verás un apartado para acceder ao formulario da convocatoria.

- **Se a túa organización non está rexistrada:** cubre o formulario de rexistro. A continuación, recibirás un correo de confirmación do rexistro cunha ligazón para establecer o contrasinal e terminar de confirmar a alta en Social Power. Após estableceres o contrasinal, introduce as credenciais para acceder á zona privada e entra no apartado de convocatorias.

PASO 2. Responde as preguntas previas e **comproba que fondo (1, 2 ou 3) se aplica á túa organización para saber que importe mínimo e máximo podes solicitar.**

Despois de premeres o apartado que anuncia a convocatoria, despregarase un cuestionario previo onde poderás revisar o cumprimento dos requisitos por parte da túa organización, así como comprobar que fondo poderá solicitar.

Só poderás solicitar financiamento no fondo asignado á túa organización, consonte os requisitos especificados nas bases da convocatoria. Lembra cales son os requisitos para acceder ao financiamento segundo o fondo asignado. Poderás realizar este cuestionario as veces que queiras; só se rexistrarán as túas respostas ao premeres o botón de solicitar financiamento.

PASO 3. Cubre o formulario de solicitude e anexa a documentación requirida segundo o fondo.

En función do fondo que a túa organización pode solicitar, abrírase o formulario de solicitude de financiamento correspondente. Lembra que podes descargar en [Word](#) as preguntas do formulario para poder preparar previamente a solicitude, mais **só poderás presentar a solicitude de financiamento mediante o formulario en liña²** habilitado na túa zona privada da web de SOCIAL POWER. **só poderás presentar a solicitude de financiamento mediante o formulario en liña³** habilitado na túa zona privada da web de SOCIAL POWER.

Non tes que cubrir o formulario de vez. Podes completalo por partes e gardalo para seguir outro día con outras seccións. Tamén podes facer as correccións que precises no formulario dende a túa zona privada da web de SOCIAL POWER, á que poderás acceder co teu nome de usuario e contrasinal.

Cando remates de cubrir o formulario na súa totalidade, anexa a documentación necesaria (consulta os documentos que se deben anexar en [REQUISITOS PARA SOLICITAR FINANCIAMENTO](#)). **Para presentar a solicitude, deberás facer clic no botón de enviar solicitude.**

³ Por motivos de eficiencia, o formulario en liña estará dispoñible unicamente na súa versión en castelán. Porén, as propostas poderán formularse en calquera lingua cooficial.

Após enviases a solicitude, recibirás un correo electrónico de confirmación do envío e poderás consultar o formulario presentado, así como o estado da solicitude, dende a túa zona privada.

Lembra que o **prazo para presentar a solicitude de financiamento remata o 31 de outubro ás 17:00 h (hora española peninsular)**. A partir dese momento, o formulario de solicitude deixará de estar dispoñible.

Recomendámosche non agardar ata o último momento para presentar a solicitude!

Non se aceptarán solicitudes presentadas fóra de prazo nin presentadas por outros medios —como o correo electrónico—. Se tes dificultades para cubrir o formulario en liña ou incidencias técnicas, podes escribir a soporte@socialpower.es. Se tes dúbidas sobre a convocatoria ou as bases, podes contactarnos en financiacion@socialpower.es.

COMO SE VAN AVALIAR OS PROXECTOS

Os proxectos serán avaliados unicamente tendo en conta a información facilitada no formulario en liña de solicitude; **non se terá en consideración ningunha outra información anexa adicional verbo do proxecto** de cara á avaliación.

Os proxectos avaliaranse atendendo a 3 criterios, de acordo cos cales cada proxecto poderá obter unha puntuación máxima de 100 puntos:

- 1) Relevancia (40 puntos)
- 2) Calidade e coherencia (40 puntos)
- 3) Impacto (20 puntos)

Para poder aspirar a financiamento, o proxecto deberá obter **un mínimo de 70 puntos** sobre 100. A continuación, detállanse os elementos que se van valorar dentro de cada criterio e a puntuación máxima que se pode obter para cada un deles.

Criterio de relevancia:

A máxima puntuación para este criterio é de **40 puntos** sobre 100. Para poder aspirar a financiamento, os proxectos deberán obter un mínimo de 25 puntos para este criterio.

Aliñamento do proxecto cunha ou máis prioridades temáticas das axendas de dereitos da convocatoria.	20 puntos
Identificación do contexto no que se desenvolverá o proxecto e relevancia da problemática social que aborda á luz do contexto.	5 puntos
Descrición e coñecemento do colectivo ou as persoas a quen se dirixe o proxecto e da situación de vulneración de dereitos que sofren. Valorarase que o proxecto traballe con colectivos especialmente afectados polas desigualdades e a discriminación, como mulleres, persoas mozas, persoas	5 puntos

SOCIAL POWER

CERV-2024-CITIZENS-VALUES

LGTBIQA+, persoas con diversidade funcional, minorías etc. Valoraranse de forma positiva as organizacións lideradas polos colectivos aos que se dirixe o proxecto.	
Experiencia da organización na problemática social e a situación de vulneración de dereitos dos colectivos e as persoas no ámbito de actuación do proxecto.	7 puntos
Co fin de aumentar o alcance e o equilibrio territorial das convocatorias de SOCIAL POWER, puntuaranse de forma adicional aquelas organizacións que se atopen nun municipio cunha poboación inferior a 1 000 000 de habitantes.	3 puntos

Criterio de calidade e coherencia:

A máxima puntuación para este criterio é de **40 puntos** sobre 100.

Claridade da lóxica do proxecto e identificación clara dos obxectivos, resultados e actividades previstos. Valorarase positivamente que o proxecto incorpore o enfoque de xustiza de xénero dende unha perspectiva interseccional.	15 puntos
Estratexia sólida e viable para levar a cabo as actividades previstas polo proxecto no período de execución previsto.	10 puntos
Orzamento axeitado e xestión eficiente dos recursos para a implementación do proxecto.	5 puntos
Identificación e descrición clara e concisa de fontes de verificación que permitan medir o progreso e os resultados obtidos polo proxecto.	10 puntos

Criterio de impacto:

A máxima puntuación para este criterio é de **20 puntos** sobre 100.

Enfoque participativo e inclusivo para involucrar os actores clave e os colectivos e persoas en situación de vulneración de dereitos para que poidan reclamar e defender os seus dereitos.	10 puntos
Potencial do proxecto para xerar un impacto positivo e sostible alén do alcance directo e inmediato das accións emprendidas.	5 puntos
Incorporación de formas e enfoques innovadores na implementación do proxecto, incluída a innovación social.	5 puntos

QUEN AVALIARÁ OS PROXECTOS

A avaliación das propostas presentadas realizaraa un equipo avaliador de Oxfam Intermón, composto por persoas con experiencia no traballo con organizacións sociais e as axendas clave desta convocatoria. Este equipo valorará cada proposta polo miúdo, reparando no contido recollido no formulario de solicitude e os criterios de avaliación.

Ademais, un dos elementos innovadores de Social Power é a incorporación de ferramentas automáticas para o seguimento e a avaliación, en consonancia co obxectivo de asegurar procesos de implementación e supervisión máis eficientes e coherentes. Nesta convocatoria empregaranse ferramentas automáticas de avaliación para apoiar a valoración das propostas presentadas. En concreto, integrarase na plataforma unha ferramenta baseada en intelixencia artificial xenerativa. A ferramenta analizará as propostas a partir dos criterios de avaliación establecidos con anterioridade na convocatoria e ofrecerá unha primeira valoración orientativa que axudará a garantir a coherencia e a axilidade do proceso.

A análise automatizada non substituirá en ningún caso a avaliación do equipo avaliador, senón que se complementará cunha revisión estruturada que levará a cabo o equipo interno de Oxfam Intermón. Todo o proceso contará cunha supervisión humana axeitada, tal e como establece o Regulamento Europeo de Intelixencia Artificial (Regulamento UE 2024/1689).

DEFINICIÓN DO IMPORTE DE FINANCIAMENTO QUE SE OUTORGARÁ

Durante o proceso de valoración das propostas de proxecto, analizarase e avaliarase a coherencia do orzamento presentado en relación coa proposta técnica e a elixibilidade dos gastos incluídos no devandito orzamento. Esta análise ten o dobre obxectivo de, por unha banda, valorar se o orzamento é axeitado e eficiente no uso dos recursos para a implementación e, por outra, establecer o importe exacto que se financiará no caso de que o proxecto sexa seleccionado.

Para determinar se o orzamento é axeitado e mais eficiente no uso dos recursos para a implementación, valorarase o seguinte:

- Que a estrutura do orzamento sexa axeitada e acorde coas actividades e o obxectivo do proxecto. Os gastos deben estar suficientemente detallados para realizar a devandita valoración.
- Que os gastos sexan razoables e xustificados para a realización do proxecto.
- Que os gastos estean incluídos dentro do período de execución do proxecto.

Para establecer o importe exacto que se financiará, no caso de que o proxecto sexa seleccionado, realizaranse as seguintes comprobacións e, se corresponde, aplicaranse os axustes pertinentes no orzamento que se financiará:

- Eliminaranse os gastos erroneamente duplicados, se os houber.
- Eliminaranse os gastos superfluos ou non precisos para a execución do proxecto, se os houber.

- Se houber conceptos de gasto sobreestimados ou subestimados en relación co prezo habitual no mercado, propoñerase corrección ou axuste.

De se precisaren aclaracións adicionais ou no caso de que cumpra axustar o orzamento para financiar con respecto ao importe solicitado pola organización, o equipo de avaliación poñerase en contacto coa organización durante o proceso de valoración.

COMO SE VAN SELECCIONAR OS PROXECTOS

Os proxectos que obteñan no proceso de avaliación unha puntuación inferior a 70 puntos non serán considerados para poder financiarse. A listaxe final de proxectos que se financiarán elaboraranse a partir da listaxe de proxectos con 70 puntos ou máis.

En primeiro lugar, a selección farase atendendo á puntuación obtida e os fondos dispoñibles para cada tramo de financiamento (ver **DOTACIÓN ORZAMENTARIA DA CONVOCATORIA**), os cales serán asignados por orde de puntuación de maior a menor de entre os proxectos presentados en cada axenda de dereitos da convocatoria. O número de proxectos que se financiarán para cada axenda de dereitos será proporcional ao número de solicitudes recibidas para cada unha delas.

Financiarase o 100 % do importe aprobado para financiar (ver **DEFINICIÓN DO IMPORTE DE FINANCIAMENTO QUE SE OUTORGARÁ**) para cada proxecto seleccionado. Lembra que, tal e como se indica máis arriba, o orzamento do proxecto non debe incluír o cofinanciamento doutras entidades doadoras.

Por último, Oxfam Intermón resérvase o dereito a non adxudicar todos os fondos dispoñibles nesta convocatoria, en función da valoración das propostas recibidas.

COMUNICACIÓN DO RESULTADO, ACEPTACIÓN E PAGAMENTO DO FINANCIAMENTO

Durante os meses de xaneiro e febreiro de 2026, comunicaranse ás organizacións se o seu proxecto foi seleccionado e o importe exacto do financiamento obtido.

As organizacións cuxo proxecto fose seleccionado procederán a asinar un Acordo de colaboración con Oxfam Intermón. Unha vez asinado o acordo por ambas as partes, procederase a realizar o primeiro pago, pola cantidade que se definise nel.

As organizacións cuxo proxecto non fose seleccionado, se o desexan, poderán solicitar unha devolución da avaliación do seu proxecto escribindo a financiacion@socialpower.es.

COMPROMISOS E OBRIGAS DAS PARTES

As organizacións cuxos proxectos sexan financiados nesta convocatoria e Oxfam Intermón establecerán un marco de colaboración baseado na confianza e o respecto mutuo e rexido dende un enfoque de horizontalidade nas relacións.

Este marco de colaboración materializarase na **sinatura dun acordo** no que se detallarán, entre outros aspectos, os compromisos e as obrigas que asumen ambas as partes. A continuación, descríbense os compromisos máis relevantes.

Oxfam Intermón asumirá, entre outros, os seguintes compromisos e obrigas:

- **Financiar o 100 % do orzamento aprobado** dos proxectos que sexan seleccionados no marco desta convocatoria e nos termos que recolla o acordo de colaboración que se asine de común acordo entre ambas as partes.
- **Avanzarlles un pagamento inicial ao comezo do proxecto ás organizacións**, segundo o establecido no acordo asinado entre as partes.
- **Realizar un seguimento coa organización da implementación do proxecto financiado**, ben sexa de forma virtual, ben presencial, dende un enfoque de horizontalidade e confianza mutua e potenciando a aprendizaxe para a mellora continua. O seguimento poderá incluír, segundo proceda, tanto aspectos técnicos de implementación do proxecto como aspectos de xestión deste.
- **Asegurar a protección de datos persoais** das organizacións financiadas e das persoas participantes nos proxectos implementados, así como **protexer a confidencialidade dos datos ou do material**, en calquera forma, que sexan identificados como información sensible polas partes.
- **Informar sobre as actividades e mais os eventos de aprendizaxe colectiva e traballo en rede que se realicen no marco de SOCIAL POWER** e que poidan ser de interese para a organización, así como promover a súa participación nos devanditos espazos.
- **Comunicar, no marco de SOCIAL POWER, os proxectos financiados e as accións e os resultados obtidos pola organización na implementación do proxecto financiado** e, cando sexa acordado, proporcionarlle apoio e asesoramento á organización en aspectos comunicativos relativos a el.

As organizacións cuxo proxecto sexa financiado deberán asumir, entre outros, os seguintes compromisos e obrigas:

- **Levar a cabo o proxecto de maneira que se garanta en todo momento o respecto dos valores da Unión Europea.**
- **Informar a Oxfam Intermón sobre a evolución do proxecto e facilitar as visitas de seguimento de Oxfam Intermón** ao proxecto, así como participar nelas. Especialmente, informar sobre calquera evento ou circunstancia que impacte na realización do proxecto.
- **Facilitar, durante a acción ou tras a súa realización, calquera información requirida por Oxfam Intermón ou a UE** co obxecto de verificar a implementación do proxecto e o cumprimento das obrigas no marco do Acordo de colaboración. En concreto, **achegar a documentación e os recursos de información necesarios** sobre a realización das actividades previstas e a consecución de resultados, así como

entregar un informe final de execución do proxecto como máximo 1 mes despois da finalización. O informe final será en formato narrativo sobre a realización do proxecto e a consecución de resultados, e achegaranse os documentos de fontes de verificación correspondentes.

- **Gardar e custodiar a documentación relativa a facturas, pagamentos, nóminas e aquela relacionada con outros gastos (Seguridade Social, IRPF, IVE etc.) durante cando menos 10 anos**, que se contarán dende a finalización do proxecto, consonte a lexislación vixente. Así mesmo, os gastos do proxecto deben quedar reflectidos na contabilidade da entidade. No caso de que unha organización non estea capacitada para garantir esta custodia de 10 anos, poderá remitir a devandita documentación a Oxfam Intermón, que será quen garantirá a custodia.
- **Evitar calquera conflito de interese na selección das persoas participantes do proxecto financiado**, así como cumprir a lexislación en materia de protección de datos.
- **Asegurar a visibilidade da Unión Europea nas accións financiadas**, comprometéndose a incluír, tanto nas actividades de comunicación dos resultados obtidos como nos equipamentos adquiridos grazas ao devandito financiamento, o emblema e a bandeira da Unión Europea. Ademais, deberase indicar claramente a orixe do financiamento, así como o descargo de responsabilidade (*disclaimer*) correspondente, como se precisa a continuación:



**Cofinanciado por
la Unión Europea**

Financiado pola Unión Europea. As opinións e os puntos de vista expresados só comprometen a/s persoa/s autora/s e non reflicten necesariamente os da Unión Europea nin os da Axencia Executiva Europea de Educación e Cultura (EACEA). Nin a Unión Europea nin a EACEA poden ser consideradas responsables deles.

Oxfam Intermón facilitaralle apoio á organización para resolver dúbidas sobre a correcta aplicación da visibilidade da UE.

CALENDARIO E DATAS CLAVE DO PROCESO DE FINANCIAMENTO

A continuación, preséntase un resumo das datas clave do proceso en relación co financiamento de actividades a organizacións, que debes ter en conta:

Datas clave	Proceso
1 de setembro de 2025	Apertura da convocatoria.
31 de outubro de 2025	Peché da convocatoria e fin da recepción de solicitudes. O prazo expira o 31 de outubro ás 17:00 h.

Datas clave	Proceso
Xaneiro-febreiro de 2026	Comunicación ás organizacións sobre resultados da selección dos proxectos.
Xaneiro-febreiro de 2026	Elaboración e sinatura dos Acordos de colaboración entre as organizacións seleccionadas e Oxfam Intermón.
Marzo-xuño de 2026	Primeiro pagamento do financiamento dos proxectos ás organizacións segundo comezo do proxecto.
1 de marzo de 2026	Data dende a cal poden iniciarse os proxectos financiados.
Febreiro-marzo de 2026 (data por precisar)	Reunión informativa coas organizacións financiadas sobre o proceso de seguimento e acompañamento.
Entre o 1 de marzo e o 31 de decembro de 2026	Seguimento do proxecto en formato virtual ou presencial, segundo o acordado.
31 de decembro de 2026	Data límite de finalización dos proxectos financiados.
31 de xaneiro de 2027	Data límite de entrega do informe final en formato narrativo e das fontes de verificación que demostren que as actividades se levaron a cabo. No caso de proxectos que finalizasen antes do 31 de decembro de 2026, o informe deberase entregar un mes despois da finalización do proxecto.

SOBRE SOCIAL POWER

Social Power é unha iniciativa de [Oxfam Intermón](#) e [Political Watch](#) que se levará a cabo ata febreiro de 2029 para contribuír a **fortalecer o traballo da sociedade civil organizada** na defensa, a protección e a promoción dos **dereitos humanos** das persoas que máis sofren as consecuencias das desigualdades e a discriminación en España.

MÁIS INFORMACIÓN SOBRE ESTA CONVOCATORIA

Esta convocatoria enmárcase no programa «Cidadanía, Igualdade, Dereitos e Valores» (CERV), posto en marcha pola Unión Europea. O obxectivo do programa CERV é soste e desenvolver sociedades abertas, baseadas en dereitos, democráticas, igualitarias e inclusivas, fundamentadas no Estado de dereito. Isto inclúe unha sociedade civil dinámica e apoderada que fomente a participación democrática, cívica e social das persoas e cultive

a rica diversidade da sociedade europea apoiándose nos valores comúns, a historia e a memoria de noso.

Se queres saber máis sobre o Programa CERV da Unión Europea, preme [aquí](#).

CONTACTO

Se tes algunha pregunta sobre as bases, podes poñerte en contacto connosco por medio do seguinte enderezo de correo: financiacion@socialpower.es.